

IZVJEŠTAJ RADNE GRUPE O STANJU INTEGRITETA U OPĆINI ODŽAK

Zaštita integriteta treba da bude u fokusu svake JLS koja je opredijeljena na razvoj što se postiže isključivo kroz djelovanje poštovanjem etičkih principa ali i proaktivan, preventivan i kontinuiran rad na jačanju sistema za zaštitu integriteta koji podrazumijeva odgovorno i transparentno djelovanje u svim sferama djelovanja i nadležnosti organa uprave JLS.

Integritet predstavlja zakonito, nepristrasno, odgovorno, ekonomično, efikasno i transparentno vršenje poslova kojima se obezbjeđuje, čuva i nadograđuje povjerenje građana u vršenju javnih funkcija i ovlaštenja, čuva integritet pojedinaca i institucije.

Jedna od projektnih aktivnosti koja za cilj ima postizanje snažnih sistema zaštite integriteta jeste izrada Plana integriteta u skladu s potrebama svake pojedine partnerske JLS, a čemu prethodi analiza i izvješće o trenutnom stanju integriteta u instituciji.

Dana 05.10.2022.godine, načelnica općine Odžak je donijela Odluku o izradi plana integriteta općine Odžak, kojom su imenovani koordinator i članovi radne grupe zaduženi za izradu plana integriteta u općini Odžak (broj: 01-02-2888/22 od 05.10.2022.godine).

Sačinjena je i obavijest uposlenicima o poduzimanju aktivnosti usmjerenih na izradu plana integriteta općine Odžak broj: 01-02-2889/22 od 05.10.2022.godine, kojom su uposlenici Općine obaviješteni da je unutar institucije započeo rad na izradi Plana integriteta, te da su obvezni surađivati sa radnom grupom i koordinatorom po pitanju pružanja neophodnih informacija i pomoći pri izradi navedenog dokumenta.

Zadatak imenovane radne grupe bio je da, u skladu sa važećim Pravilima za izradu plana integriteta u institucijama BiH koja je izradila Agencija za prevenciju korupcije i koordinaciju borbe protiv korupcije u BiH, kao i temeljem navedenih pravila izrađenog Praktičnog priručnika za izradu plana integriteta u jedinicama lokalne samouprave u Bosni i Hercegovini, kao i ostalim relevantnim propisima koje regulišu pitanje prevencije korupcije, izvrši analizu postojećeg stanja, prikupi neophodnu dokumentaciju za izradu plana integriteta, pregleda i analizira prikupljenu dokumentaciju, provede anketu putem anonimnog upitnika, identifikira i analizira rizike i faktore rizika, te predloži mjere i preporuke za poboljšanje i očuvanje integriteta u općini Odžak, odnosno da sačini nacrt Plana integritea općine Odžak.

Neposredno po imenovanju, radna grupa je održala sastanak gdje je konstatovano o kakvim zadacima se radi, a članovi Radne grupe su obaviješteni da će Radnoj grupi biti pružena tehnička podrška u ovom procesu kroz najavljene online konzultacije kao pomoć prilikom izrade plana integriteta, te je dostavljena i elektronska verzija praktičnog priručnika za izradu plana integriteta u JLS u BiH koji je razvijen u okviru MEG projekta i koji može poslužiti tokom pripreme za konzultacije i samu izradu plana integriteta.

Nadalje je sačinjen Program rada radne skupine za izradu Prijedloga plana integriteta općine Odžak u kojem su određeni ključni zadaci, rokovi i osobe zadužene za njihovo izvršenje, te koji je nakon toga upućen Općinskoj načelnici na odobrenje.

Radna grupa je u svom radu prikupila neophodnu dokumentaciju za izradu plana integriteta, odnosno postojeće interne akte, izvršila njihov pregled i početnu analizu, podijeljeni su upitnici za samoprocjenu integriteta zaposlenima u općini Odžak, te je izvršena identifikacija i analiza rizika i faktora rizika, kao i predložene mjere za unapređenje integriteta.

Tokom rada na izradi Plana integriteta, odnosno analizom popunjenih upitnika za samoprocjenu integriteta, kao i analizom postojećih internih akata općine Odžak, radna grupa je zaključila da su sljedeće oblasti podložne koruptivnom djelovanju u općini Odžak:

- Upravljanje materijalno-financijskim sredstvima,
- Etika i osobni integritet,
- Upravljanje i rukovođenje JLS,
- Upravljanje ljudskim resursima,
- Javne nabave,
- Uredsko poslovanje.

U okviru naprijed navedenih oblasti kao najrizičniji procesi i rizici podložni koruptivnom djelovanju u općini Odžak, u kojima je neophodno ojačati kapacitete općine Odžak, su izdvojeni: dodjela grant sredstava neprofitnim organizacijama bez javnog poziva i njihovo nenamjensko trošenje, neprijavljivanje stvarnih i potencijalnih sukoba interesa, nezakonito primanje i davanje darova, neizvršavanje i kašnjenje u izvršavanju zakonskih nadležnosti usljed nepreciziranosti poslova i zadataka službi i radnih mjesta postojećim pravilnikom o organizaciji i sistematizaciji radnih mjesta, procesi u oblasti javnih nabavki kao mogućnost korupcije prilikom kontakta sa dobavljačima i sl., mogućnost korupcije prilikom kontakta sa strankama, procesi u zapošljavanju i drugo.

Dana 27.02.2023. godine radna grupa je sačinila konačnu verziju nacрта Plana integriteta općine Odžak koju je uputila Općinskoj načelnici na razmatranje sa napomenom obveze dostavljanja istog na mišljenje nadležnom tijelu za borbu protiv korupcije.

Veljača, 2023.godine

Radna grupa za izradu Plana integriteta općine Odžak